

Taittirīya-Brāhmaṇa

Book 2, Chapter 8

Edited by Subramania Sarma, Chennai

Final proofread version, 1st April 2005

[[2-8-1-1]]

पीवो॑न्ना॒ रयि॑वृ॒धः सु॒मे॒घाः ।
श्वे॒तः सि॑ष॒क्ति॒ नि॒यु॒ता॒म॒भि॒श्रीः ।
ते वा॒यवे॑ स॒म॒न॒सो॒ वि॒त॒स्थुः ।
वि॒श्वे॒न्नरः॑ स्व॒प॒त्यानि॑ च॒क्रुः ।
रा॒येऽनु॑ यं ज॒ज्ञत् रो॑द॒सी उ॒भे ।
रा॒ये दे॒वी धि॒षणा॑ धाति॒ दे॒वम् ।
अ॒घा वा॒युं नि॒युतः॑ स॒श्वत॒ स्वाः ।
उ॒त श्वे॒तं वसु॑धितिं॒ निरे॒के ।
आ वा॒यो प्र॒याभिः॑ ।
प्र वा॒युम॑च्छा॒ बृह॒ती म॑नी॒षा ॥ १ ॥

[[2-8-1-2]]

बृ॒ह॒द्र॒यिं वि॒श्ववा॑रा॒ रथ॑प्राम् ।
द्यु॒त॒द्या॒मा नि॒युतः॑ प॒त्य॒मानः ।
क॒विः क॒विमि॑य॒क्षसि॑ प्र॒यज्यो॑ ।
आ नो॑ नि॒युद्भिः॑ श॒तिनी॑भि॒रध्व॑रम् ।
स॒ह॒स्त्रिणी॑भि॒रुप॑ याहि॒ य॒ज्ञम् ।
वा॒यो अ॒स्मिन्ह॒विषि॑ मा॒दय॑स्व ।
यू॒यं पा॑त॒ स्व॒स्तिभिः॑ सदा॒ नः ।
प्रजा॑प॒ते न त्वदे॑तान्य॒न्यः ।
वि॒श्वा जा॒तानि॑ परि॒ ता ब॑भूव ।
यत्का॑मास्ते जुहु॒मस्तन्नो॑ अस्तु ॥ २ ॥

[[2-8-1-3]]

व॒यः॑ स्या॒म प॑त॒यो र॒यीणा॑म् ।

र॒यीणां॑ पतिं॑ य॒ज॒तं बृ॒हन्त॑म्।
 अ॒स्मिन्भ॒रे नृ॒त॒मं वा॒ज॒सातौ॑।
 प्र॒जा॒पतिं॑ प्रथ॒म॒जामृ॑तस्य।
 य॒जाम॑ दे॒वमधि॑ नो ब्रवीतु।
 प्र॒जा॒पते॒ त्वं नि॒धि॒पाः पु॒रा॒णः।
 दे॒वानां॑ पि॒ता ज॒नि॒ता प्र॒जाना॑म्।
 पति॒र्विश्व॑स्य॒ जग॑तः पर॒स्याः।
 ह॒विर्नो॑ दे॒व वि॒ह॒वे जु॑षस्व।
 तवे॒मे लो॒काः प्र॒दिशो॑ दि॒शश्च॑ ॥ ३ ॥

[[2-8-1-4]]

परा॒वतौ॑ नि॒वत॑ उ॒द्ध॒तश्च॑।
 प्र॒जा॒पते॒ विश्व॑सृ॒ज्जीव॑ध॒न्य इ॒दं नो॑ दे॒व।
 प्र॒ति॒ह॒र्य ह॒व्यम्।
 प्र॒जा॒पतिं॑ प्रथ॒मं य॒ज्ञिया॑नाम्।
 दे॒वाना॑म॒ग्रे य॒ज॒तं य॑जध्वम्।
 स नो॑ द॒दातु॑ द्र॒विण॑ सु॒वीर्य॑म्।
 रा॒य॒स्पोषं॑ वि॒ष्य॒तु ना॒भि॒म॒स्मे।
 यो रा॒य ई॒शो श॑तदा॒य उ॒क्थ्यः॑।
 यः प॑शूना॑ र॒क्षिता॑ वि॒ष्टिता॑नाम्।
 प्र॒जा॒पतिः॑ प्रथ॒म॒जा ऋ॒तस्य॑ ॥ ४ ॥

[[2-8-1-5]]

स॒ह॒स्र॑धा॒मा जु॑षता॑ ह॒विर्नः॑।
 सो॒मा॒पू॒षणे॒मौ दे॒वौ।
 सो॒मा॒पू॒षणा॒ रज॑सो वि॒मान॑म्।
 स॒प्त॒च॒क्रं र॑थ॒मवि॑श्वमि॒न्वम्।
 वि॒ष॒वृ॒तं म॑न॒सा यु॒ज्य॒मान॑म्।
 तं जि॒न्व॒थो वृ॑षणा॒ पञ्च॑र॒श्मि॒म्।
 दि॒व्य॒न्यः स॑द॒नं च॒क्र उ॒च्चा।
 पृ॒थि॒व्याम॒न्यो अ॒ध्य॒न्तरि॑क्षे।

तावस्मभ्यं पुरुवारं पुरुक्षुम्।
रायस्योषं विष्यतां नाभिमस्मे ॥ ५ ॥

[[2-8-1-6]]

धियं पूषा जिन्वतु विश्वमिन्वः।
रयिꣳ सोमो रयिपतिर्दधातु।
अवतु देव्यदितिरनर्वा।
बृहद्वदेम विदथै सुवीराः।
विश्वान्यन्यो भुवना जजान।
विश्वमन्यो अभिचक्षाण एति।
सोमापूषणाववतं धियं मे।
युवभ्यां विश्वाः पृतना जयेम।
उदुत्तमं वरुणास्तभ्राद्याम्।
यत्किंचेदं कितवासः।
अव ते हेडस्तत्त्वा यामि।
आदित्यानामवसा न दक्षिणा।
धारयन्त आदित्यासस्तिस्त्रो भूमीर्धारयन्।
यज्ञो देवानाꣳ शुचिरपः ॥ ६ ॥
मनीषाऽस्तु चर्तस्यास्मे कितवासश्चत्वारि च ॥ १ ॥

[[2-8-2-1]]

ते शुक्रासः शुचयो रश्मिवन्तः।
सीदन्नादित्या अधि बर्हिषि प्रिये।
कामेन देवाः सरथं दिवो नः।
आयान्तु यज्ञमुप नो जुषाणाः।
ते सूनवो अदितेः पीवसामिषम्।
घृतं पिन्वत्प्रतिहर्यन्नृतेजाः।
प्र यज्ञिया यजमानाय येमुरे।
आदित्याः कामं पितुमन्तमस्मे।
आ नः पुत्रा अदितेर्यान्तु यज्ञम्।
आदित्यासः पथिभिर्देवयानैः ॥ १ ॥

[[2-8-2-2]]

अस्मे कामं दाशुषे सन्नमन्तः ।
पुरोडाशं घृतवन्तं जुषन्ताम् ।
स्कभायत निर्र्द्यतिः सेधतामतिम् ।
प्र रश्मिभिर्यतमाना अमृधाः ।
आदित्याः काम प्रयतां वषट्कृतिम् ।
जुषध्वं नो हव्यदातिं यजत्राः ।
आदित्यान्कामवसे हुवेम ।
ये भूतानि जनयन्तो विचिख्युः ।
सीदन्तु पुत्रा अदितेरुपस्थम् ।
स्तीर्णं बर्हिर्विरद्याय देवाः ॥ २ ॥

[[2-8-2-3]]

स्तीर्णं बर्हिः सीदता यज्ञे अस्मिन् ।
ध्राजाः सेधन्तो अमतिं दुरेवाम् ।
अस्मभ्यं पुत्रा अदितेः प्रयसत ।
आदित्याः कामं हविषो जुषाणाः ।
अग्ने नय सुपथा राये अस्मान् ।
विश्वानि देव वयुनानि विद्वान् ।
युयोध्यस्मज्जुहुराणमेनः ।
भूयिष्ठां ते नमउक्तिं विधेम ।
प्र वः शुक्राय भानवे भरध्वम् ।
हव्यं मतिं चाग्नये सुपूतम् ॥ ३ ॥

[[2-8-2-4]]

यो दैव्यानि मानुषा जनूषि ।
अन्तर्विश्वानि विद्वाना जिगाति ।
अच्छा गिरौ मतयो देवयन्तीः ।
अग्निं यन्ति द्रविणं भिक्षमाणाः ।
सुसंदशं सुप्रतीकं स्वञ्चम् ।
हव्यवाहमरतिं मानुषाणाम् ।

अग्ने त्वमस्मद्युयोध्यमीवाः ।
अनग्नित्रा अभ्यमन्त कृष्टीः ।
पुनरस्मभ्यं सुविताय देव ।
क्षां विश्वेभिरजरेभिर्यजत्र ॥ ४ ॥

[[2-8-2-5]]

अग्ने त्वं पारया नव्यो अस्मान् ।
स्वस्तिभिरति दुर्गाणि विश्वा ।
पृथ्वी बहुला न उर्वी ।
भवां तोकाय तनयाय शं योः ।
प्र कारवो मनना वच्यमानाः ।
देवद्रीचीं नयथ देवयन्तः ।
दक्षिणावाङ्वाजिनी प्राच्येति ।
हविर्भरन्त्यग्रये घृताचीं ।
इन्द्रं नरो युजे रथम् ।
जगृभ्णा ते दक्षिणामिन्द्र हस्तम् ॥ ५ ॥

[[2-8-2-6]]

वसूयवो वसुपते वसूनाम् ।
विद्महि त्वा गोपतिं शूर गोनाम् ।
अस्मभ्यं चित्रं वृषणं रयिं दाः ।
तवेदं विश्वमभितः पशव्यम् ।
यत्पश्यसि चक्षसा सूर्यस्य ।
गवामसि गोपतिरेक इन्द्र ।
भक्षीमहि ते प्रयतस्य वस्वः ।
समिन्द्र णो मनसा नेषि गोभिः ।
सं सूरिभिर्मघवन्त्सं स्वस्त्या ।
सं ब्रह्मणा देवकृतं यदस्ति ॥ ६ ॥

[[2-8-2-7]]

सं देवानां सुमत्या यज्ञियानाम् ।
आराच्छत्रुमपबाधस्व दूरम् ।

उ॒ग्रो यः श॒म्बः पुरु॒हूत॒ तेन॑ ।
 अ॒स्मे धे॑हि॒ यव॑म॒द्रोम॑दिन्द्र ।
 कृ॒धी धि॑यं॒ जरि॑त्रे वा॒जर॑त्नाम् ।
 आ॒वेध॑स॒स हि शु॑चिः ।
 बृ॒हस्प॑तिः प्रथ॒मं जा॑यमानः ।
 म॒होज्यो॑तिषः पर॒मे व्यो॑मन् ।
 स॒प्तास्य॑स्तुविजा॒तो रवे॑ण ।
 वि स॒प्तर॑श्मि॒रध॑मत्तमा॒सि ॥ ७ ॥

[[2-8-2-8]]

बृ॒हस्प॑तिः सम॑ज॒यद्व॑सूनि ।
 म॒हो ब्र॑जान्गोम॒तो दे॒व ए॒षः ।
 अ॒पः सि॑षासन्त्सु॒वर॑प्रती॒त्तः ।
 बृ॒हस्प॑तिर्ह॒न्त्य॒मित्र॑म॒कैः ।
 बृ॒हस्प॑ते पर्ये॒वा पि॑त्रे ।
 आ नो॑ दि॒वः पा॑वीर॒वी ।
 इ॒मा जु॒ह्वाना॒ यस्ते॒ स्तनः॑ ।
 सर॑स्वत्य॒भि नो॑ नेषि ।
 इ॒यस्य॑ शु॒ष्मोभि॑र्बिस॒खा इ॑वारुजत् ।
 सानु॑ गिरी॒णां त॑वि॒षेभि॑रू॒र्मिभिः॑ ।
 पा॒राव॑द्घ्नीम॒वसे॑ सुवृ॒क्तिभिः॑ ।
 सर॑स्वती॒मावि॑वासेम धी॒तिभिः॑ ॥ ८ ॥
 दे॒वयो॑ने॒र्दे॒वाः सु॑पू॒तं य॑जत्र॒ हस्त॑मस्ति॒ तमा॑स्य॒स्यू॒र्मिभि॑र्द्वे च ॥ २ ॥

[[2-8-3-1]]

सोमो॑ धे॒नुस्य॑ सोमो॒ अर्व॑न्तमा॒शुम् ।
 सोमो॑ वी॒रं क॑र्म॒ण्यं द॑दातु ।
 सा॒दन्यं॑ वि॒दथ्य॑स्य॒ सभे॑यम् ।
 पि॒तुःश्र॑वणं॒ यो द॑दा॒शद॑स्मै ।
 अ॒षाढं॑ यु॒त्सु त्व॑स्य॒ सौम॑ क्रतुभिः ।
 या ते॒ धामा॑नि॒ ह॒विषा॒ यज॑न्ति ।

त्वमिमा ओषधीः सोम विश्वाः ।
त्वमपो अजनयस्त्वं गाः ।
त्वमाततन्थोर्वन्तरिक्षम् ।
त्वं ज्योतिषा वितमो ववर्थ ॥ १ ॥

[[2-8-3-2]]

या ते धामानि दिवि या पृथिव्याम् ।
या पर्वतेष्वोषधीष्वप्सु ।
तेभिर्नो विश्वैः सुमना अहेडन् ।
राजन्त्सोम प्रति हव्या गृभाय ।
विष्णोर्नु कं तदस्य प्रियम् ।
प्र तद्विष्णुः ।
परो मात्रया तनुवा वृधान ।
न ते महित्वमन्वश्चुवन्ति ।
उभे ते विद्म रजसी पृथिव्या विष्णो देव त्वम् ।
परमस्य वित्से ॥ २ ॥

[[2-8-3-3]]

विचक्रमे त्रिदेवः ।
आ ते महो यो जात एव ।
अभि गोत्राणि ।
आभिः स्पृधो मिथतीररिषण्यन् ।
अमित्रस्य व्यथया मन्युमिन्द्र ।
आभिर्विश्वा अभियुजो विषूचीः ।
आर्याय विशोऽवतरीर्दासीः ।
अयं शृण्वे अध जयन्नुत घ्नन् ।
अयमुत प्रकृणुते युधा गाः ।
यदा सत्यं कृणुते मन्युमिन्द्रः ॥ ३ ॥

[[2-8-3-4]]

विश्वं दृढं भयत एजदस्मात् ।
अनु स्वधामक्षरन्नापो अस्य ।

अवर्धत मध्य आ नाव्यानाम्।
 सध्रीचीनेन मनसा तमिन्द्र ओजिष्ठेन।
 हन्मनाऽहन्नभिद्यून।
 मरुत्वन्तं वृषभं वावृधानम्।
 अकवारि दिव्यं शासमिन्द्रम्।
 विश्वासाहमवसे नूतनाय।
 उग्रं सहोदामिह तं हुवेम।
 जनिष्ठा उग्रः सहसे तुराय ॥ ४ ॥

[[2-8-3-5]]

मन्द्र ओजिष्ठो बहुलाभिमानः।
 अवर्धन्निन्द्रं मरुतश्चिदत्र।
 माता यद्वीरं दधनद्धनिष्ठा।
 क्व स्या वो मरुतः स्वधाऽऽसीत्।
 यन्मामेकं समधत्ताहिहत्यै।
 अहं ह्युग्रस्तविषस्तुविष्मान्।
 विश्वस्य शत्रोरनमं वधस्त्रैः।
 वृत्रस्य त्वा श्वसथादीषमाणाः।
 विश्वे देवा अजहुर्ये सखायः।
 मरुद्भिरिन्द्र सख्यं ते अस्तु ॥ ५ ॥

[[2-8-3-6]]

अथेमा विश्वाः पृतना जयासि।
 वर्धो वृत्रं मरुत इन्द्रियेण।
 स्वेन भामेन तविषो बभूवान्।
 अहमेता मनवे विश्वश्चन्द्राः।
 सुगा अपश्चकर वज्रबाहुः।
 स यो वृषा वृष्णिषेभिः समोकाः।
 महो दिवः पृथिव्याश्च सम्राट्।
 सतीनसत्त्वा हव्यो भरेषु।
 मरुत्वान्नो भवत्विन्द्र ऊती।

इन्द्रो वृत्रमतरद्वृत्रतूर्यै ॥ ६ ॥

[[2-8-3-7]]

अनाधृष्यो मघवा शूर इन्द्रः ।
अन्वेनं विशो अमदन्त पूर्वीः ।
अयं राजा जगतश्चर्षणीनाम् ।
स एव वीरः स उ वीर्यावान् ।
स एकराजो जगतः परस्याः ।
यदा वृत्रमतरच्छूर इन्द्रः ।
अथाभवद्मिताऽभिक्रतूनाम् ।
इन्द्रो यज्ञं वर्धयन्विश्ववेदाः ।
पुरोडाशस्य जुषतां हविर्नः ।
वृत्रं तीर्त्वा दानवं वज्रबाहुः ॥ ७ ॥

[[2-8-3-8]]

दिशोऽदृहृहृहिता दृहणेन ।
इमं यज्ञं वर्धयन्विश्ववेदाः ।
पुरोडाशं प्रतिगृभ्णात्विन्द्रः ।
यदा वृत्रमतरच्छूर इन्द्रः ।
अथैकराजो अभवज्जनानाम् ।
इन्द्रो देवाच्छम्बरहत्य आवत् ।
इन्द्रो देवानामभवत्पुरोगाः ।
इन्द्रो यज्ञे हविषा वावृधानः ।
वृत्रतूर्णो अभयं शर्म यंसत् ।
यः सप्त सिन्धूरदधात्पृथिव्याम् ।
यः सप्त लोकानकृणोद्दिशश्च ।
इन्द्रो हविष्मान्त्सगणो मरुद्भिः ।
वृत्रतूर्णो यज्ञमिहोपयासत् ॥ ८ ॥
ववर्थ वित्स इन्द्रस्तु रायास्तु वृत्रतूर्ये वज्रबाहुः पृथिव्यां त्रीणि च ॥ ३ ॥

[[2-8-4-1]]

इन्द्रस्तरस्वानभिमातिहोग्रः ।

हिरण्यवाशीरिषिः सुवर्षाः।
 तस्य वयं सुमतौ यज्ञियस्य।
 अपि भद्रे सौमनसे स्याम।
 हिरण्यवर्णो अभयं कृणोतु।
 अभिमातिहेन्द्रः पृतनासु जिष्णुः।
 स नः शर्म त्रिवरूथं वियंसत्।
 यूयं पात स्वस्तिभिः सदा नः।
 इन्द्रं स्तुहि वज्रिणं स्तोमपृष्ठम्।
 पुरोडाशस्य जुषतां हविर्नः ॥ १ ॥

[[2-8-4-2]]

हत्वाऽभिमातीः पृतनाः सहस्वान्।
 अथाभयं कृणुहि विश्वतो नः।
 स्तुहि शूरं वज्रिणमप्रतीत्तम्।
 अभिमातिहनं पुरुहूतमिन्द्रम्।
 य एक इच्छतपतिर्जनैषु।
 तस्मा इन्द्राय हविराजुहोत।
 इन्द्रो देवानामधिपाः पुरोहितः।
 दिशां पतिरभवद्वाजिनीवान्।
 अभिमातिहा तविषस्तुविष्मान्।
 अस्मभ्यं चित्रं वृषणं रयिं दात् ॥ २ ॥

[[2-8-4-3]]

य इमे द्यावापृथिवी महित्वा।
 बलेनादृहदभिमातिहेन्द्रः।
 स नो हविः प्रतिगृभ्णातु रातये।
 देवानां देवो निधिपा नो अव्यात्।
 अनवस्ते रथं वृष्णे यत्तै।
 इन्द्रस्य नु वीर्याण्यहन्नहिम्।
 इन्द्रो यातोऽवसितस्य राजा।
 शर्मस्य च शृङ्गिणो वज्रबाहुः।

सेदु राजा॑ क्षेति चर्षणीनाम्।
अरान्न नेमिः परिता बभूव ॥ ३ ॥

[[2-8-4-4]]

अभि सिध्मो अजिगादस्य शत्रून्।
वि तिग्मेन वृषभेणा पुरोऽभेत्।
सं वज्रेणासृजद्वृत्रमिन्द्रः।
प्र स्वां मतिमतिरच्छाशदानः।
विष्णुं देवं वरुणमृतये भगाम्।
मेदसा देवा वपया यजध्वम्।
ता नो यज्ञमागतं विश्वधेना।
प्रजावदस्मे द्रविणेह धत्तम्।
मेदसा देवा वपया यजध्वम्।
विष्णुं च देवं वरुणं च रातिम् ॥ ४ ॥

[[2-8-4-5]]

ता नो अमीवा अपबाधमानौ।
इमं यज्ञं जुषमाणावुपेतम्।
विष्णूवरुणा युवमध्वराय नः।
विशे जनाय महि शर्म यच्छतम्।
दीर्घप्रयज्यू हविषा वृधाना।
ज्योतिषाऽरातीर्दहतं तमांसि।
ययोरोजसा स्कमिता रजांसि।
वीर्यैभिर्वीरतमा शविष्ठा।
या पत्येते अप्रतीत्ता सहोभिः।
विष्णू अगन्वरुणा पूर्वहृतौ ॥ ५ ॥

[[2-8-4-6]]

विष्णूवरुणावभिश्चिपा वाम्।
देवा यजन्त हविषा घृतेन।
अपामीवां सेधतं रक्षसंश्च।
अथा धत्तं यजमानाय शं योः।

अ॒हो॒मु॒चा वृष॒भा सु॒प्रतू॒र्ती।
दे॒वानाँ॑ दे॒वत॑मा॒ शचि॑ष्ठा।
विष्णु॑व॒रुणा॒ प्रति॑हर्य॒तं नः॑।
इ॒दं न॒रा प्र॑य॒तमू॒तये॑ ह॒विः।
म॒ही नु॑ द्यावा॑पृथि॒वी इ॒ह ज्ये॑ष्ठै।
रु॒चा भ॑वता॒ शुच॑य॒द्विर॒कैः ॥ ६ ॥

[[2-8-4-7]]

यत्सी॑ वरि॒ष्ठे बृ॒हती॑ वि॒मि॒न्वन्।
नृ॒व॒द्भ्योऽक्षा॑ प॒प्रथाने॑भि॒रेवैः॑।
प्र पूर्॑व॒जे पि॒तरा॒ नव्य॑सीभिः।
गी॒र्भिः कृ॑णु॒ध्व॒ सद॑ने ऋ॒तस्य॑।
आ नो॑ द्यावा॑पृथि॒वी दै॒व्येन॑।
जने॑न या॒तं महि॑ वां व॒रूथ॑म्।
स इ॒त्स्वपा॑ भु॒वने॑ष्वास।
य इ॒मे द्यावा॑पृथि॒वी ज॒जान॑।
उ॒र्वी ग॑भी॒रे रज॑सी सु॒मेके॑।
अ॒व॒शो धी॒रः श॒च्या॒ समै॑रत् ॥ ७ ॥

[[2-8-4-8]]

भूरि॑ द्वे अ॒चर॑न्ती॒ चर॑न्तम्।
प॒द्वन्तं॑ ग॒र्भम॑पदी॒ दधा॑ते।
नि॒त्यं न॒ सूनुं॑ पि॒त्रोरु॑प॒स्थै।
तं पि॑पृ॒त॒ रोद॑सी स॒त्यवा॑चम्।
इ॒दं द्यावा॑पृथि॒वी स॒त्यम॑स्तु।
पि॒त॒र्मा॒त॒र्यदि॑होप॒ब्रुवे॑ वा॒म्।
भू॒तं दे॒वाना॑म॒वमे॑ अ॒वो॑भिः।
वि॒द्यामे॑षं वृ॒जनं॑ जी॒रदा॑नुम्।
उ॒र्वी पृ॒थ्वी बहु॑ले॒ दूरे॑ अ॒न्ते।
उ॒प॒ब्रुवे॑ नम॑सा॒ यज्ञे॑ अ॒स्मिन्।
दधा॑ते॒ ये सु॒भगे॑ सु॒प्रतू॒र्ती।

द्यावा रक्षतं पृथिवी नो अभ्वात्।
या जाता ओषधयोऽतिविश्वाः परिष्ठाः।
या ओषधयः सोमं राज्ञीरश्वावतीं सौमवतीम्।
ओषधीरिति मातरोऽन्या वो अन्यामवतु ॥ ८ ॥
हविर्नो दाद्वभूव रातिं पूर्वहृतावकैरैरदस्मिन्पञ्च च ॥ ४ ॥

[[2-8-5-1]]

शुचिं नु स्तोमं श्रथद्वृत्रम्।
उभा वामिन्द्राग्नी प्रचर्षणिभ्यः।
आवृत्रहणा गीर्भिर्विप्रः।
ब्रह्मणस्पते त्वमस्य यन्ता।
सूक्तस्य बोधि तनयं च जिन्व।
विश्वं तद्भद्रं यदवन्ति देवाः।
बृहद्वदेम विदथे सुवीराः।
स ईं सत्येभिः सखिभिः शुचिभिः।
गोधायसं वि धनसैरतर्दत्।
ब्रह्मणस्पतिर्वृषभिर्वराहैः ॥ १ ॥

[[2-8-5-2]]

घर्मस्वेदोभिर्द्रविणं व्यानट्।
ब्रह्मणस्पतेरभवद्यथा वशम्।
सत्यो मन्युर्महि कर्मा करिष्यतः।
यो गा उदाजत्स दिवे वि चाभजत्।
महीव रीतिः शवसा सरत्पृथक्।
इन्धानो अग्निं वनवद्वनुष्यतः।
कृतब्रह्मा शूशुवद्रातहव्य इत्।
जातेन जातमति सृत्प्रसृसते।
यं यं युजं कृणुते ब्रह्मणस्पतिः।
ब्रह्मणस्पते सुयमस्य विश्वहा ॥ २ ॥

[[2-8-5-3]]

रायः स्याम रथ्यो विवस्वतः।

वीरेषु वीराः उपपृङ्घि नस्त्वम्।
 यदीशानो ब्रह्मणा वेषि मे हवाम्।
 स इज्जनेन स विशा स जन्मना।
 स पुत्रैर्वाजं भरते धना नृभिः।
 देवानां यः पितरमाविवासति।
 श्रद्धामना हविषा ब्रह्मणस्पतिम्।
 यास्ते पूषन्ना वो अन्तः।
 शुक्रं ते अन्यत्पूषेमा आशाः।
 प्रपथे पथामजनिष्ट पूषा ॥ ३ ॥

[[2-8-5-4]]

प्रपथे दिवः प्रपथे पृथिव्याः।
 उभे अभि प्रियतमे सधस्थै।
 आ च परा च चरति प्रजानन्।
 पूषा सुबन्धुर्दिव आपृथिव्याः।
 इडस्पतिर्मघवा दस्मवर्चाः।
 तं देवासो अददुः सूर्यायै।
 कामेन कृतं तवसः स्वञ्चम्।
 अजाश्वः पशुपा वाजवस्त्यः।
 धियंजिन्वो विश्वे भुवने अर्पितः।
 अष्ट्रं पूषा शिथिरामुद्वरीवृजत् ॥ ४ ॥

[[2-8-5-5]]

संचक्षाणो भुवना देव ईयते।
 शुची वो हव्या मरुतः शुचीनाम्।
 शुचिः हिनोम्यध्वरः शुचिभ्यः।
 ऋतेन सत्यमृतसाप आयन्।
 शुचिजन्मानः शुचयः पावकाः।
 प्र चित्रमर्कं गृणते तुराय।
 मारुताय स्वतवसे भरध्वम्।
 ये सहासि सहसा सहन्ते।

रेजते अग्ने पृथिवी मखेभ्यः।
अःसेष्वा मरुतः खादयो वः ॥ ५ ॥

[[2-8-5-6]]

वक्षस्सु रुक्मा उपशिश्रियाणाः।
वि विद्युतो न व्यृष्टिभी रुचानाः।
अनु स्वधामायुधैर्यच्छमानाः।
या वः शर्म शशमानाय सन्ति।
त्रिधातूनि दाशुषे यच्छताधि।
अस्मभ्यं तानि मरुतो वियन्त।
रयिं नो धत्त वृषणः सुवीरम्।
इमे तुरं मरुतो रामयन्ति।
इमे सहः सहस आनमन्ति।
इमे शःसं वनुष्यतो निपान्ति ॥ ६ ॥

[[2-8-5-7]]

गुरुद्वेषो अरुरुषे दधन्ति।
अरा इवेदचरमा अहेव।
प्र प्रजायन्ते अकवा महोभिः।
पृश्नेः पुत्रा उपमासो रभिष्ठाः।
स्वया मत्या मरुतः संमिमिक्षुः।
अनु ते दायि मह इन्द्रियाय।
सत्रा ते विश्वमनु वृत्रहत्यै।
अनु क्षत्तमनु सहो यजत्र।
इन्द्र देवेभिरनु ते नृषह्यै।
य इन्द्र शुष्मो मघवन्ते अस्ति ॥ ७ ॥

[[2-8-5-8]]

शिक्षा सखिभ्यः पुरुहूत नृभ्यः।
त्वः हि दृढा मघवन्विचेताः।
अपावृधि परिवृतिं न राधः।
इन्द्रो राजा जगतश्चर्षणीनाम्।

अधि॒क्षमि॒ विषु॑रूपं॒ यदस्ति॑ ।
 ततो॑ ददातु दा॒शुषे॒ वसू॑नि ।
 चो॒द्राघ॒ उप॑स्तुतश्चि॒द॒र्वाक् ।
 तमु॑ष्टुहि॒ यो अ॒भिभू॑त्यो॒जाः ।
 व॒न्वन्न॑वा॒तः पु॒रुहू॑त॒ इन्द्रः॑ ।
 अषा॑ढमु॒ग्रं सह॑मानमा॒भिः ।
 गी॒र्भिर्व॑र्ध वृष॒भं च॑र्षणी॒नाम् ।
 स्थू॒रस्य॑ रा॒यो बृ॒हतो॑ य ईश॑ ।
 तमु॑ष्टवाम वि॒दथे॑ष्विन्द्र॑म् ।
 यो वा॒युना॒ जय॑ति॒ गोम॑तीषु ।
 प्र धृ॑ष्णुया न॑यति॒ वस्यो॑ अ॒च्छ ।
 आ ते॒ शुष्मो॑ वृष॒भ ए॒तु प॒श्चात् ।
 ओ॒त्तरा॑द॒धरा॑गा पु॒रस्ता॑त् ।
 आ वि॒श्वतो॑ अ॒भि समे॑त्व॒र्वाङ् ।
 इन्द्र॑ द्यु॒म्नं सु॑र्व॒द्धेह्य॑स्मे ॥ ८ ॥
 व॒राहै॑र्वि॒श्वहा॑ऽजनिष्ट॒ पूषो॑द्वरी॒वृज॑त्वा॒दयो॑ वः पा॒न्त्यस्त्या॑भिर्न॒व च ॥ ५ ॥

[[2-8-6-1]]

आ दे॒वो या॑तु सवि॒ता सुर॑त्नः ।
 अ॒न्तरि॑क्ष॒प्रा वह॑मानो॒ अश्वैः॑ ।
 हस्ते॒ दधानो॑ न॒र्या पुरु॑णि ।
 नि॒वेश॑यन् च प्रसु॒वन् च भूम॑ ।
 अ॒भीवृ॑त्तं कृ॒शनै॑र्वि॒श्वरूप॑म् ।
 हि॒रण्य॑श॒म्यं यज॑तो बृ॒हन्त॑म् ।
 आ॒स्था॒द्रथं॑ सवि॒ता चि॒त्रभा॑नुः ।
 कृ॒ष्णा रजा॑ंसि॒ तवि॑षीं॒ दधानः॑ ।
 स॒घा नो॑ दे॒वः स॑वि॒ता स॒वाय॑ ।
 आसा॑विष॒द्वसु॑पति॒र्वसू॑नि ॥ १ ॥

[[2-8-6-2]]

वि॒श्रय॑माणो॒ अम॑तिमु॒रूची॑म् ।

म॒र्त॒भो॒ज॒न॒म॒घं॒ रा॒स॒ते॒ न॒।
 वि॒ ज॒ना॑ञ्छ्या॒वाः॒ शि॒ति॒पा॒दौ॑ अ॒ख्यन्।
 रथ॑ꣳ हिरण्यप्र उ॒गं॒ वह॑न्तः।
 श॒श्व॒द्दि॒शः॑ स॒वि॒तु॒र्दे॒व्य॒स्य॒।
 उ॒प॒स्थे॒ विश्वा॒ भुव॑नानि तस्थुः।
 वि॒ सु॒पर्णो॑ अ॒न्तरि॑क्षाण्यख्यत्।
 ग॒भी॒र॒वै॒पा॒ असुरः॑ सु॒नी॒थः॒।
 कै॒दा॒नीꣳ सूर्यः॑ कश्चिकेत।
 क॒त॒मां॒ द्याꣳ र॒श्मि॒र॒स्या॒त॒तान॑ ॥ २ ॥

[[2-8-6-3]]

भ॒गं॒ धि॒र्यं॒ वा॒ज॒य॒न्तः॒ पुर॑न्धिम्।
 न॒रा॒शꣳसो॑ ग्नास्पतिर्नो॑ अव्यात्।
 आ॒ऽये॒ वा॒म॒स्य॑ सं॒ग॒थे॒ र॒यी॒णाम्।
 प्रि॒या॒ दे॒व॒स्य॑ स॒वि॒तुः॒ स्या॑म।
 आ॒ नो॒ विश्वे॑ अ॒स्क्रा॑ ग॒म॒न्तु॒ दे॒वाः॒।
 मि॒त्रो॒ अ॒र्य॒मा॒ वरु॑णः स॒जोषाः॑।
 भु॒व॒न्य॒था॒ नो॒ विश्वे॑ वृ॒धा॒सः॒।
 क॒र॑न्त्सुष॒हा॒ वि॒थु॒रं॒ न॒ श॒वः॒।
 शं॒ नो॑ दे॒वा॒ वि॒श्व॒दे॒वा॒ भ॒व॒न्तु॒।
 शꣳ स॒र॒स्व॒ती॒ स॒ह॒ धी॒भि॒र॒स्तु॑ ॥ ३ ॥

[[2-8-6-4]]

श॒म॒भि॒षा॒चः॒ श॒मु॒ रा॒ति॒षा॒चः॒।
 शं॒ नो॑ दि॒व्याः॒ पा॒र्थि॒वाः॒ शं॒ नो॑ अ॒प्याः॑।
 ये॒ स॒वि॒तुः॒ स॒त्य॒स॒व॒स्य॒ विश्वे॑।
 मि॒त्र॒स्य॑ व्र॒ते॒ वरु॑णस्य दे॒वाः॒।
 ते॒ सौ॒भ॒गं॒ वी॒र॒व॒द्रो॒म॒द॒प्रः॒।
 द॒धा॒त॒न॒ द्र॒वि॒णं॒ चि॒त्र॒म॒स्मे॒।
 अ॒ग्ने॑ या॒हि॒ दू॒त्यं॒ वा॒रि॑षेण्यः।
 दे॒वाꣳ अ॒च्छा॑ ब्रह्म॒कृ॒ता॑ ग॒णे॒न॒।

सरस्वतीं मरुतो अश्विनाऽपः ।
यक्षि देवान्नक्षत्रधेयाय विश्वान् ॥ ४ ॥

[[2-8-6-5]]

द्यौः पितः पृथिवि मातरश्चुक्र ।
अग्नौ भ्रातर्वसवो मृडता नः ।
विश्व आदित्या आदिते सजोषाः ।
अस्मभ्यं शर्म बहुलं वियन्त ।
विश्वे देवाः शृणुतेमं हव मे ।
ये अन्तरिक्षे य उप द्यवि ष ।
ये अग्निजिह्वा उत वा यजत्राः ।
आसद्यास्मिन्बर्हिषि मादयध्वम् ।
आ वा मित्रावरुणा हव्यजुष्टिम् ।
नमसा देवाववसाऽऽववृत्याम् ॥ ५ ॥

[[2-8-6-6]]

अस्माकं ब्रह्म पृतनासु सह्या अस्माकम् ।
वृष्टिर्दिव्या सुपारा ।
युवं वस्त्राणि पीवसा वसाथे ।
युवोरच्छिद्रा मन्तवो ह सर्गाः ।
अवातिरतमनृतानि विश्वा ।
ऋतेन मित्रावरुणा सचेथे ।
तत्सु वा मित्रावरुणा महित्वम् ।
ईर्मा तस्थुषीरहभिर्दुहे ।
विश्वाः पिन्वथ स्वसरस्य धेनाः ।
अनु वामेकः पविराववर्ति ॥ ६ ॥

[[2-8-6-7]]

यद्वं हिष्ठं नातिविदे सुदानू ।
अच्छिद्रं शर्म भुवनस्य गोपा ।
ततो नो मित्रावरुणाववीष्टम् ।
सिषासन्तो जीगिवांसः स्याम ।

आ नो मित्रावरुणा हव्यदातिम्।
घृतैर्गव्यूतिमुक्षतमिडाभिः।
प्रतिवामत्र वरमा जनाय।
पृणीतमुद्रो दिव्यस्यं चारोः।
प्र बाहवा सिसृतं जीवसे नः।
आ नो गव्यूतिमुक्षतं घृतेन ॥ ७ ॥

[[2-8-6-8]]

आ नो जनै श्रवयतं युवाना।
श्रुतं मे मित्रावरुणा हवेमा।
इमा रुद्राय स्थिरधन्वने गिरः।
क्षिप्रेषवे देवाय स्वधाम्नै।
अषाढाय सहमानाय मीढुषै।
तिग्मायुधाय भरता शृणोतन।
त्वा दत्तेभी रुद्र शंतमेभिः।
शतं हिमा अशीय भेषजेभिः।
व्यस्मद्वेषो वितरं व्यंहः।
व्यमीवाश्चातयस्वा विषूचीः ॥ ८ ॥

[[2-8-6-9]]

अहंन्विभर्षि मा नस्तोके।
आ ते पितर्मरुतां सुम्रमेतु।
मा नः सूर्यस्य संदृशो युयोथाः।
अभि नो वीरो अर्वति क्षमेत।
प्रजायेमहि रुद्र प्रजाभिः।
एवा बभ्रो वृषभ चेकितान।
यथा देव न हृणीषे न हंसि।
हावनश्रूर्नो रुद्रेह बोधि।
बृहद्वदेम विदथे सुवीराः।
परि णो रुद्रस्य हेतिः स्तुहि श्रुतम्।
मीढुष्टमार्हंन्विभर्षि।

त्वमग्ने रुद्र आ वो राजानम् ॥ ९ ॥

वसूनि ततानास्तु विश्वान्ववृत्यां ववर्ति घृतेन विषूचीश्श्रुतं द्वे च ॥ ६ ॥

[[2-8-7-1]]

सूर्यो देवीमुषसं रोचमाना मर्यः ।

न योषामभ्येति पश्चात् ।

यत्रा नरो देवयन्तो युगानि ।

वितन्वते प्रति भद्राय भद्रम् ।

भद्रा अश्वा हरितः सूर्यस्य ।

चित्रा एदग्वा अनुमाद्यासः ।

नमस्यन्तो दिव आ पृष्ठमस्थुः ।

परि द्यावापृथिवी यन्ति सद्यः ।

तत्सूर्यस्य देवत्वं तन्महित्वम् ।

मध्या कर्तोर्विततं संजभार ॥ १ ॥

[[2-8-7-2]]

यदेदयुक्त हरितः सधस्थात् ।

आद्रात्री वासस्तनुते सिमस्मै ।

तन्मित्रस्य वरुणस्याभिचक्षै ।

सूर्यो रूपं कृणुते द्योरुपस्थै ।

अनन्तमन्यद्रुशदस्य पाजः ।

कृष्णमन्यद्धरितः संभरन्ति ।

अद्या देवा उदिता सूर्यस्य ।

निरहंसः पिपृतान्निरवद्यात् ।

तन्नो मित्रो वरुणो मामहन्ताम् ।

अदितिः सिन्धुः पृथिवी उत द्यौः ॥ २ ॥

[[2-8-7-3]]

दिवो रुक्म उरुचक्षा उदेति ।

दूरे अर्थस्तरणिभ्राजमानः ।

नूनं जनाः सूर्येण प्रसूताः ।

आयन्नर्थानि कृणवन्नपांसि ।

शं नो भव चक्षसा शं नो अह्ना।
शं भानुना शं हिमाशं घृणेन।
यथा शमस्मै शमसद्दुरोणे।
तत्सूर्यं द्रविणं धेहि चित्रम्।
चित्रं देवानामुदगादनीकम्।
चक्षुर्मित्रस्य वरुणस्याग्नेः ॥ ३ ॥

[[2-8-7-4]]

आप्रा द्यावापृथिवी अन्तरिक्षम्।
सूर्यं आत्मा जगतस्तस्थुषश्च।
त्वष्टा दधत्तन्नस्तुरीपम्।
त्वष्टा वीरं पिशङ्गरूपः।
दशमं त्वष्टुर्जनयन्त गभम्।
अतन्द्रासो युवतयो बिभर्त्रम्।
तिग्मानीकं स्वयंशसंजनेषु।
विरोचमानं परिषीं नयन्ति।
आविष्ट्यो वर्धते चारुरासु।
जिह्वानामूर्ध्वः स्वयंशा उपस्थे ॥ ४ ॥

[[2-8-7-5]]

उभे त्वष्टुर्विभ्यतुर्जायमानात्।
प्रतीचीं सिं हं प्रतिजोषयेते।
मित्रो जनान् प्रसमित्र।
अयं मित्रो नमस्यः सुशेवः।
राजा सुक्षत्रो अजनिष्ट वेधाः।
तस्य वयं सुमतौ यज्ञियस्य।
अपि भद्रे सौमनसे स्याम।
अनमीवासं इडया मदन्तः।
मितज्मवो वरिमन्ना पृथिव्याः।
आदित्यस्य व्रतमुपक्ष्यन्तः ॥ ५ ॥

[[2-8-7-6]]

व॒यं मि॒त्रस्य॑ सु॒मतौ॑ स्या॒म।
 मि॒त्रं न ई॑श् शि॒म्या गो॑षु ग॒व्यव॑त्।
 स्वा॒धियो॑ वि॒दथे॑ अ॒प्स्वजी॑जनन्।
 अरे॑जयता॒श् रोद॑सी पाजसा गि॒रा।
 प्रति॑ प्रि॒यं य॑ज॒तं ज॒नुषा॑मवः।
 महा॑श् आ॒दित्यो॑ नमसोप॒सद्यः॑।
 या॒तय॑ज्जनो गृण॒ते सु॒शेवः॑।
 तस्मा॑ ए॒तत्प॑न्य॒तमाय॑ जुष्ट॒म्।
 अ॒ग्नौ मि॒त्राय॑ ह॒विरा॑जु॒होत॑।
 आ वा॑श् रथो॒ रोद॑सी ब॒द्धधा॑नः ॥ ६ ॥

[[2-8-7-7]]

हि॒र॒ण्ययो॑ वृष॒भिर्या॑त्व॒श्वैः।
 घृ॒तव॑र्त॒निः प॒विभी॑ रु॒चानः॑।
 इ॒षां वो॒ढा नृ॑पति॒र्वाजि॑नी॒वान्।
 स प॑प्र॒थानो॑ अ॒भि प॑ञ्चभू॒मं।
 त्रि॒व॒न्धुरो॑ मन॒साऽऽया॑तु यु॒क्तः।
 विशो॑ येन॒ गच्छ॑थो दे॒वय॑न्तीः।
 कु॒त्राचि॑द्याम॒मश्वि॑ना॒ दधा॑ना।
 स्व॒श्वा य॑शसाऽऽया॑तम॒र्वाक्।
 द॒स्त्रा नि॒धिं म॑धु॒मन्तं॑ पि॒बाथः॑।
 वि वा॑श् रथो॒ वध्वा॑ याद॒मानः॑ ॥ ७ ॥

[[2-8-7-8]]

अ॒न्ता॑न्दि॒वो बा॑धते व॒र्तनि॑भ्या॒म्।
 यु॒वोः श्रि॒यं परि॑ योषा॑ वृणी॒त।
 सू॒रो दु॒हिता॑ परि॒तक्मि॑यायाम्।
 यद्दे॑व॒यन्त॑मव॒थः श॑ची॒भिः।
 परि॑घ्न॒श् स वां॑ म॒ना वां॑ व॒यो गाम्।
 यो ह॒ स्य वा॑श् रथि॒रा व॑स्त॒ उ॒स्त्राः।
 रथो॑ यु॒जानः॑ परि॒याति॑ व॒र्तिः।

तेन नः शं योरुषसो व्युष्टौ।
न्यश्विना वहतं यज्ञे अस्मिन्।
युवं भुज्युमवविद्धं समुद्रे ॥ ८ ॥

[[2-8-7-9]]

उदूहथुरर्णसो अस्त्रिधानैः।
पत्त्रिभिरश्रमैरव्यथिभिः।
दंसनाभिरश्विना पारयन्ता।
अग्नीषोमा यो अद्य वाम्।
इदं वचः सपर्यति।
तस्मै धत्तं सुवीर्यम्।
गवां पोषुः स्वश्वियम्।
यो अग्नीषोमा हविषा सपर्यात्।
देवद्रीचा मनसा यो घृतेन।
तस्य व्रतं रक्षतं पातमंहसः ॥ ९ ॥

[[2-8-7-10]]

विशे जनाय महि शर्म यच्छतम्।
अग्नीषोमा य आहुतिम्।
यो वां दाशाद्धविष्कृतिम्।
स प्रजया सुवीर्यम्।
विश्वमायुर्व्यश्नवत्।
अग्नीषोमा चेति तद्वीर्यं वाम्।
यदमुष्णीतमवसं पणिं गोः।
अवातिरतं प्रथयस्य शेषः।
अविन्दतं ज्योतिरेकं बहुभ्यः।
अग्नीषोमाविमं सुमेऽग्नीषोमा हविषः प्रस्थितस्य ॥ १० ॥
जभार द्यौरग्नेरुपस्थ उपक्ष्यन्तौ बद्धधानो यादमानः समुद्रेऽंहसः प्रस्थितस्य ॥ ७ ॥

[[2-8-8-1]]

अहमस्मि प्रथमजा ऋतस्य।
पूर्वं देवेभ्यो अमृतस्य नाभिः।

यो मा ददाति स इदेव माऽऽवाः ।
अहमन्नमन्नमदन्तमग्नि ।
पूर्वमग्नेरपि दहत्यन्नम् ।
यत्तौ हाऽऽसाते अहमुत्तरेषु ।
व्यात्तमस्य पशवः सुजम्भम् ।
पश्यन्ति धीराः प्रचरन्ति पाकाः ।
जहाम्यन्यं न जहाम्यन्यम् ।
अहमन्नं वशमिच्चरामि ॥ १ ॥

[[2-8-8-2]]

समानमर्थं पर्येमि भुञ्जत् ।
को मामन्नं मनुष्यो दयेत ।
पराके अन्नं निहितं लोक एतत् ।
विश्वैर्देवैः पितृभिर्गुप्तमन्नम् ।
यदद्यते लुप्यते यत्परोप्यते ।
शततमी सा तनूर्मे बभूव ।
महान्तौ चरू संकृद्गुधेन पप्रौ ।
दिवं च पृश्नि पृथिवीं च साकम् ।
तत्संपिबन्तो न मिनन्ति वेधसः ।
नैतद्भूयो भवति नो कनीयः ॥ २ ॥

[[2-8-8-3]]

अन्नं प्राणमन्नमपानमाहुः ।
अन्नं मृत्युं तमु जीवातुमाहुः ।
अन्नं ब्रह्माणो जरसं वदन्ति ।
अन्नमाहुः प्रजननं प्रजानाम् ।
मोघमन्नं विन्दते अप्रचेताः ।
सत्यं ब्रवीमि वध इत्स तस्य ।
नार्यमणं पुष्यति नो सखायम् ।
केवलाघो भवति केवलादी ।
अहं मेघः स्तनयन्वर्षन्नस्मि ।

मामदन्त्यहमद्भ्यन्यान् ॥ ३ ॥

[[2-8-8-4]]

अह॑ꣳ सद॒मृ॒तौ भवामि॑ ।
मदा॑दित्या अधि॒ सर्वे॑ तपन्ति ।
दे॒वीं वाच॑मजनयन्त॒ यद्वाग्ब॑दन्ती ।
अ॒न॒न्ताम॒न्तादधि॑निर्मितां म॒हीम् ।
यस्या॑ दे॒वा अ॒द॒धुर्भोज॑नानि ।
एका॑क्षरां द्वि॒पदा॑ꣳ ष॒ददां॑ च ।
वाचं॑ दे॒वा उप॑जीवन्ति॒ विश्वे॑ ।
वाचं॑ दे॒वा उप॑जीवन्ति॒ विश्वे॑ ।
वाचं॑ गन्ध॒र्वाः प॒शवो॑ म॒नुष्याः॑ ।
वा॒चीमा॑ विश्वा॒ भुव॑नान्यर्पिता ॥ ४ ॥

[[2-8-8-5]]

सा नो॑ ह॒वँ जुष॑तामिन्द्र॒पत्नी॑ ।
वाग॑क्षरं प्रथम॒जा ऋ॒तस्य॑ ।
वेदानां॑ मा॒ताऽमृ॒तस्य॑ नाभिः ।
सा नो॑ जुषा॒णोप॑यज्ञमागात् ।
अव॑न्ती दे॒वी सु॒हवा॑ मे अस्तु ।
यामृ॑षयो मन्त्र॒कृतो॑ मनी॒षिणः॑ ।
अ॒न्वैच्छ॑न्दे॒वास्तप॑सा श्रमेण ।
तां दे॒वीं वाच॑ꣳ ह॒विषा॑ यजामहे ।
सा नो॑ दधातु सुकृ॒तस्य॑ लो॒के ।
च॒त्वारि॑ वाक्प॒रिमिता॑ प॒दानि॑ ॥ ५ ॥

[[2-8-8-6]]

तानि॑ विदुर्ब्राह्म॒णा ये म॑नी॒षिणः॑ ।
गुहा॑ त्रीणि॒ निहि॑ता॒ नेङ्ग॑यन्ति ।
तु॒रीयं॑ वा॒चो म॑नुष्या॒ वद॑न्ति ।
श्रद्ध॑याऽग्निः॒ समि॑ध्यते ।
श्रद्ध॑या॒ विन्द॑ते ह॒विः ।

श्रद्धां भगस्य मूर्धनि।
वचसाऽऽवेदयामसि।
प्रियं श्रद्धे ददतः।
प्रियं श्रद्धे दिदासतः।
प्रियं भोजेषु यज्वसु ॥ ६ ॥

[[2-8-8-7]]

इदं म उदितं कृधि।
यथा देवा असुरेषु।
श्रद्धामुग्नेषु चक्रिरे।
एवं भोजेषु यज्वसु।
अस्माकमुदितं कृधि।
श्रद्धां देवा यजमानाः।
वायुगोपा उपासते।
श्रद्धां हृदय्याऽऽकूत्या।
श्रद्धया हूयते हविः।
श्रद्धां प्रातर्हवामहे ॥ ७ ॥

[[2-8-8-8]]

श्रद्धां मध्यंदिनं परि।
श्रद्धां सूर्यस्य निमृचि।
श्रद्धे श्रद्धापयेह मा।
श्रद्धा देवानधिवस्ते।
श्रद्धा विश्वमिदं जगत्।
श्रद्धां कामस्य मातरम्।
हविषा वर्धयामसि।
ब्रह्म जज्ञानं प्रथमं पुरस्तात्।
वि सीमतः सुरुचो वेन आवः।
स बुधिया उपमा अस्य विष्ठाः ॥ ८ ॥

[[2-8-8-9]]

सतश्च योनिमसतश्च विवः।

पि॒ता वि॒राजा॑मृष॒भो रयी॑णाम्।
अ॒न्तरि॑क्षं वि॒श्वरूप॑ आवि॒वेश।
तम॑कै॒रभ्य॑र्चन्ति व॒त्सम्।
ब्रह्म॑ सन्तं ब्रह्म॑णा व॒र्धय॑न्तः।
ब्रह्म॑ दे॒वान॑जनयत्।
ब्रह्म॑ वि॒श्वमि॒दं जग॑त्।
ब्रह्म॑णः क्ष॒त्रं निर्मि॑तम्।
ब्रह्म॑ ब्राह्म॑ण आ॒त्मना॑।
अ॒न्तर॑स्मिन्नि॒मे लो॒काः ॥ ९ ॥

[[2-8-8-10]]

अ॒न्तर्वि॑श्वमि॒दं जग॑त्।
ब्रह्मै॒व भू॒तानां॑ ज्येष्ठ॑म्।
तेन॑ कोऽर्ह॑ति स्पर्धि॑तुम्।
ब्रह्म॑न्दे॒वास्त्रय॑स्त्रिंशत्।
ब्रह्म॑न्निन्द्र॒प्रजा॑पती।
ब्रह्म॑न्ह॒ विश्वा॑ भू॒तानि॑।
ना॒वीवा॒न्तः स॒माहि॑ता।
चत॑स्र॒ आशाः॑ प्रच॒रन्त्व॒ग्नयः॑।
इ॒मं नो॑ य॒ज्ञं न॑यतु प्रजा॒नन्।
घृ॒तं पि॒न्वन्न॑जर॒ सुवी॑रम् ॥ १० ॥

[[2-8-8-11]]

ब्रह्म॑ स॒मिद्भ॑व॒त्याहु॑तीनाम्।
आ गा॒वो अ॑गमन्नु॒त भ॒द्रम॑क्रन्।
सीद॑न्तु गो॒ष्ठे र॒णय॑न्त्व॒स्मे।
प्र॒जाव॑तीः पुरु॒रूपा॑ इ॒ह स्युः॑।
इन्द्रा॑य पूर्वी॒रुष॑सो दुहा॑नाः।
इन्द्रो॑ यज्व॒ने पृ॑णते च शिक्षति।
उपे॑द्दाति न स्वं मु॒षाय॑ति।
भूयो॑ भूयो र॒यिमि॑दस्य व॒र्धय॑न्।

अभिन्ने खिल्ले निदधाति देवयुम्।
न तानशान्ति न ता अवाँ ॥ ११ ॥

[[2-8-8-12]]

गावो भगो गाव इन्द्रो मे अच्छात्।
गावः सोमस्य प्रथमस्य भक्षः।
इमा या गावः स जनास इन्द्रः।
इच्छामीद्धृदा मनसा चिदिन्द्रम्।
यूयं गावो मेदयथा कृशं चित्।
अश्लीलं चित्कृणुथा सुप्रतीकम्।
भद्रं गृहं कृणुथ भद्रवाचः।
बृहद्वो वयं उच्यते सभासु।
प्रजावतीः सूयवसं रिशन्तीः।
शुद्धा अप सुप्रपाणे पिबन्तीः।
मा वः स्तेन ईशत माऽघशंसः।
परि वो हेती रुद्रस्य वृञ्ज्यात्।
उपेदमुपपर्चनम्।
आसु गोषूपपृच्यताम्।
उपर्षभस्य रेतसि।
उपेन्द्र तव वीर्ये ॥ १२ ॥

चरामि कनीयोऽन्यानर्पिता पदानि यज्वसु हवामहे विष्ठा लोकाः सुवीरमर्वा पिबन्तीष्वट् च ॥ ८ ॥

[[2-8-9-1]]

ता सूर्याचन्द्रमसा विश्वभृत्तमा महत्।
तेजो वसुमद्राजतो दिवि।
सामात्माना चरतः सामचारिणा।
ययौर्व्रतं न ममे जातु देवयोः।
उभावन्तौ परियात् अम्या।
दिवो न रश्मीस्तनुतो व्यर्णवे।
उभा भुवन्ती भुवना कविक्रतू।
सूर्या न चन्द्रा चरतो हतामती।

पतीं॑ द्युमद्वि॑श्वविदा॑ उ॒भा दि॒वः ।
सूर्या॑ उ॒भा च॒न्द्रम॑सा विच॒क्षणा ॥ १ ॥

[[2-8-9-2]]

वि॒श्ववा॑रा विरि॒वोभा॑ वर॑ण्या ।
ता नो॑ऽवतं मति॒मन्ता॑ महि॒व्रता॑ ।
वि॒श्वव॑परी प्र॒तर॑णा तर॒न्ता ।
सु॒वर्वि॑दा दृ॒शये॑ भूरि॒रश्मी॑ ।
सूर्या॑ हि च॒न्द्रा वसु॑ त्वेष॒ दर्श॑ता ।
म॒नस्वि॑नो॒भाऽनु॑च॒रतो॑ नु सं दि॒वम् ।
अ॒स्य श्रवो॑ न॒द्यः स॒प्त बि॑भ्रति ।
द्यावा॑ क्षामा॑ पृथि॒वी दर्श॑तं वपुः ।
अ॒स्मे सूर्या॑च॒न्द्रम॑साऽभि॒चक्षे॑ ।
श्रद्धे॑ क॒मिन्द्र॑ च॒रतो॑ विच॒तुर॑म् ॥ २ ॥

[[2-8-9-3]]

पूर्वा॑परं च॒रतो॑ मा॒ययै॑तौ ।
शि॒शू क्री॑डन्तौ परि॒यातो॑ अध्व॒रम् ।
वि॒श्वान्य॑न्यो भुव॒नाऽभि॑चष्टे ।
ऋ॒तून॑न्यो वि॒दध॑ज्जायते पुनः ।
हिर॑ण्यवर्णाः शुच॑यः पाव॒का यासा॑ऽ॒ राजा॑ ।
यासा॑ दे॒वाः शि॒वेन॑ मा॒ चक्षु॑षा पश्यत ।
आपो॑ भ॒द्रा आदि॑त्पश्यामि ।
नास॑दासीन्नो सदा॑सीत्त॒दानी॑म् ।
नासी॑द्रजो॒ नो व्यो॑माप॒रो यत् ।
कि॒माव॑रीवः कुह॒ कस्य॑ शर्मन् ॥ ३ ॥

[[2-8-9-4]]

अ॒म्भः कि॒मासी॑द्रह॒नं ग॒भीर॑म् ।
न मृ॒त्युर॑मृतं तर्हि॒ न ।
रात्रि॑या अ॒हं आसी॑त्प्र॒केतः॑ ।
आनी॑दवा॒तः स्व॒धया॑ तदेक॑म् ।

तस्माद्द्वान्यं न परः किञ्च नासि।
तम आसीत्तमसा गूढमग्रे प्रकेतम्।
सलिलं सर्वमा इदम्।
तुच्छेनाभ्वपिहितं यदासीत्।
तमसस्तन्महिना जायतैकम्।
कामस्तदग्रे समवर्तताधि ॥ ४ ॥

[[2-8-9-5]]

मनसो रेतः प्रथमं यदासीत्।
सतो बन्धुमसति निरविन्दन्।
हृदि प्रतीष्या कवयो मनीषा।
तिरश्चीनो विततो रश्मिरेषाम्।
अधस्विदासीश्दुपरि स्वदासीश्त्।
रेतोधा आसन्महिमान आसन्।
स्वधा अवस्तात्प्रयतिः परस्तात्।
को अद्धा वेद क इह प्रवोचत्।
कुत आजाता कुत इयं विसृष्टिः।
अर्वाग्देवा अस्य विसर्जनाय ॥ ५ ॥

[[2-8-9-6]]

अथा को वेद यत आ बभूव।
इयं विसृष्टिर्यत आबभूव।
यदि वा दधे यदि वा न।
यो अस्याध्यक्षः परमे व्योमन्।
सो अङ्ग वेद यदि वा न वेद।
किञ्चिद्वनं क उ स वृक्ष आसीत्।
यतो द्यावापृथिवी निष्टतक्षुः।
मनीषिणो मनसा पृच्छतेदु तत्।
यदध्यतिष्ठद्भुवनानि धारयन्।
ब्रह्म वनं ब्रह्म स वृक्ष आसीत् ॥ ६ ॥

[[2-8-9-7]]

यतो द्यावापृथिवी निष्टतक्षुः।
 मनीषिणो मनसा विब्रवीमि वः।
 ब्रह्माध्यतिष्ठद्भुवनानि धारयन्।
 प्रातरग्निं प्रातरिन्द्रं हवामहे।
 प्रातर्मित्रावरुणा प्रातरश्विनां।
 प्रातर्भगं पूषणं ब्रह्मणस्पतिम्।
 प्रातः सोममुत रुद्रं हुवेम।
 प्रातर्जितं भगमुग्रं हुवेम।
 वयं पुत्रमदितेयो विघर्ता।
 आध्रश्चिद्यं मन्यमानस्तुरश्चित् ॥ ७ ॥

[[2-8-9-8]]

राजाचिद्यं भगं भक्षीत्याहं।
 भग प्रणेतर्भग सत्यराधः।
 भगेमां धियमुदव ददन्नः।
 भग प्र णो जनय गोभिरश्वैः।
 भग प्र नृभिर्नृवन्तः स्याम।
 उतेदानीं भगवन्तः स्याम।
 उत प्रपित्व उत मध्ये अह्नाम्।
 उतोदिता मघवन्त्सूर्यस्य।
 वयं देवानां सुमतौ स्याम।
 भग एव भगवां अस्तु देवाः ॥ ८ ॥

[[2-8-9-9]]

तेन वयं भगवन्तः स्याम।
 तं त्वां भग सर्वं इज्जोहवीमि।
 स नो भग पुर एता भवेह।
 समध्वरायोषसो नमन्त।
 दधिक्रावैव शुचये पदाय।
 अर्वाचीनं वसुविदं भगं नः।
 रथमिवाश्वा वाजिन आवहन्तु।

अश्वावतीर्गोमतीर्न उषासः ।

वीरवतीः सदमुच्छन्तु भद्राः ।

घृतं दुहाना विश्वतः प्रपीनाः ।

यूयं पात स्वस्तिभिः सदा नः ॥ ९ ॥

विचक्षणा विचर्तुरं शर्मन्नधिविसर्जनाय ब्रह्म वनं ब्रह्म स वृक्ष आसीत्तुरश्चिद्देवाः प्रपीना एकं च ॥ ९ ॥
पीवोऽन्नान्ते शुक्रासः सोमो धेनुमिन्द्रस्तरस्वाञ्छुचिमा देवो यातु सूर्यो देवीमहमस्मि ता सूर्याचन्द्रमसा
नव ॥ ९ ॥

पीवोऽन्नामग्ने त्वं पारयानाधृष्यः शुचिं नु स्तोमं विश्रयमाणो दिवो रुक्मोऽन्नं प्राणं ता सूर्याचन्द्रमसा
नवसप्ततिः ॥ ७९ ॥